



Cumün da Valsot

Tel. +41 (0)81 861 00 60 • Fax +41 (0)81 861 00 61 • info@valsot.ch • www.valsot.ch

Poz 86 • CH-7556 Ramosch

Affischa

Suprastanza cumünala dals 12.9.2017

Presidi: Peer-Puorger Victor

Participant/s: Mayer-Schlegel Armon
Caviezel-Domenig Ursina
Kirchen-Werro Armon
Riatsch-Fedi Fadri

Absaint:

Protocol: Fallet-Taverna Marco

Fabrica: Paulmichl-Rodigari Albin

Giast/s:

tractandas	tema	responsabel
121	012 Executiva Acconsentimaint protocol	mf
122	021 Administraziun da fabrica Dum. da fabrica no. 047/2017, renovaziuns internas, rimplazzamaint fanestras, Roos Hugo, parcella 69, Stradella, 7557 Vnà	vp/ap
123	021 Administraziun da fabrica Dum. da fabrica no. 044/2017, renovaziuns internas, porta da chasa e da cuort novas, Camozzi Cesare, parcella 6189, Chaflur 1-133, 7558 Strada	vp/ap
124	021 Administraziun da fabrica Dum. da fabrica no. 041/2017, chasa nouva d'üna famiglia, garascha dubla, pumpa da chalur dad ajer, Fili Christian, parcella 492, Curtins , 7556 Ramosch	vp/ap
125	021 Administraziun da fabrica Dum. da fabrica no. 032/2015, fabrichar oura chasa e tablà, Mathieu-Frick Nicola, parcella 192, Plaz, 7556 Ramosch Müdamaint da fanestras / implant da solar sün tet	vp/ap
126	021 Administraziun da fabrica Dum. da fabrica no. 073/2015, garascha suotterrana e suost per veiculs, Koch Nicola, parcella 158, Plajet, 7556 Ramosch Disposiziun	vp/mf
127	810 Administraziun forestala Chanzlas sülla bos-cha	vp/ap
128	790 Planisaziun dal territori Ingrondimaint zona da deponia Prà Dadora	vp/ap
129	801 Vias champestras Surpassamaint vias champestras	vp/mf

130	300 Promoziun da cultura Contribuziun al Padrinadi Svizzer per cumüns in muntogna Fuond special pel cumün da Bondo	vp/mf
131	012 Executiva Orientaziuns	tuots
132	012 Executiva Varia (suprastanza cumünala)	tuots

012 Executiva

121 Acconsentimaint protocol

Il protocol dals 22 avuost 2017 vegn approvà.

021 Administraziun da fabrica

122 Dum. da fabrica no. 047/2017, renovaziuns internas, rimplazzamaint fanestras, Roos Hugo, parcella 69, Stradella, 7557 Vnà

Il petent ha surtut la chasa d'abitar dal dazi. Quel prevezza sül plan terrain da müdar las fanestras e da far üna part insolaziun. Sül plan sura prevezza quel da far üna part isolaziun e da remetter la chadafö ed il bagn sco eir da müdar las fanestras, quai in medem möd sco las existentas cun duos trapartidas. Vers inoura daja be müdamaints da fanestras.

I sun avantman 4 plazzas da parcar, quai chi'd es sufficient. La 5avla e 6avla da quellas, remarchadas sül plan, ha la direcziun decis da strichar. La suprastanza va daperüna cun quai e decida da conceder il permiss. La dumonda da fabrica nu sto gnir publichada (procedura d'annunzcha).

021 Administraziun da fabrica

123 Dum. da fabrica no. 044/2017, renovaziuns internas, porta da chasa e da cuort novas, Camozzi Cesare, parcella 6189, Chaflur 1-133, 7558 Strada

Avant duos ons d'eira gnü concess il permiss per fabricar oura il tablà. Uossa ha il petent intoltrà la dumonda per far alchüns müdamaints interns. Il permiss davart da l'uffizi da pulizia da fö es avantman. La fatschenda a reguard las plazzas da parcar es reglada. La dumonda nu sto gnir publichada. La suprastanza conceda il permiss da fabrica.

021 Administraziun da fabrica

124 Dum. da fabrica no. 041/2017, chasa nouva d'üna famiglia, garascha dubla, pompa da chalur dad ajer, Fili Christian, parcella 492, Curtins , 7556 Ramosch

La dumonda es statta publichada fin als 30 avuost 2017. Pel vial previs e l'infrastructura es fingià gnü concess ün permiss da fabrica. Da la vart sura es previs la construcziun d'üna garascha. Quella surpasa però la fanestra da fabrica per 0,5m. Seguond la direcziun sto la garascha gnir construida illa fanestra da fabrica, dimena la garascha sto gnir spostada per 0,5m. Las masüras e la cifra d'utilisaziun sun in uorden. La parcella es i'l fratemp gnüda inscrida i'l cudesch fundiari.

Il cumün sto cumpletter là sia infrastruttura cun üna lingia ed ün idrant tanter las parcelas nr. 492 e 493. La suprastanza decida da realisar quai in cumbinaziun cull'infrastructura previssa per quel quartier. La dumonda pel credit necessari vain trattada in occasiun da la prosma sezzüda.

La suprastanza conceda il permiss da fabrica cun vusch unanima.

021 Administraziun da fabrica

125 Dum. da fabrica no. 032/2015, fabricar oura chasa e tablà, Mathieu-Frick Nicola, parcella 192, Plaz, 7556 Ramosch

Müdamaint da fanestras / implant da solar sün tet

Müdamaint fanestras fatschada vers süd

La suprastanza vaiva concess il permiss da fabrica, il qual prevezzaiva cullas fanestras üna separaziun da la part da la chasa d'abitar e dal tablà. Uossa ha il patrun da fabrica inoltrà la dumonda cun trais variantas per pudair istess installar i'l spazi da separaziun las fanestras cul motiv da guadagnar clerità. La cumischium da fabrica sco eir la cusgliadra da fabrica scusglieschan quai e sun da l'avis chi saja indispensabel da mantegner l'aspet (fingià gnü discus cun conceder il permiss oriund) cha la separaziun tanter chasa e tablà saja datta. La suprastanza examinescha la fatschenda e riva a la conclusiun cha quel permiss nu po gnir concess.

Müdamaint da duos fanestras vers nord

Il patrun da fabrica dumonda per far adattamaints vi da quellas fanestras. La suprastanza conceda il permiss per quels müdamaints.

Indriz solar sül tet vers sūd

La fatschenda es in uorden ed il permiss vain concess. La suprastanza metta però cundiziun, cha'l patrun da fabrica sto trar masüras da sgürezza per evitar, cha la naiv e glatsch crouda giò sül via e piazza publica e pudess latras ferir a persunas. Ultra da quai sto l'indriz solar gnir muni cun material chi nu reflectescha als objects vaschins. Ant co chi vain concess il permiss da fabrica sto il patrun da fabrica procurar l'acconsentimaint dals vaschins. Scha quai nu reuschischa sto il proget gnir publichà.

021 Administraziun da fabrica

- 126 **Dum. da fabrica no. 073/2015, garascha suotterrana e suost per veiculs, Koch Nicola, parcella 158, Plajet, 7556 Ramosch**
Disposiziun

Cul fabricat es il patrun da fabrica surpassà las prescripziuns da la ledscha da fabrica. La suprastanza ha consultà il decret da multa, redigi da nos cusgliader giuridic, e til chatta per bun. Ella decida latras da relaschar quel decret.

810 Administraziun forestala

- 127 **Chanzlas sül bos-cha**

Davart da l'uffizi per la natüra e l'ambient d'eira gnü infuormà, cha manaders da gitas, hajan fotografà a Palü Lunga üna chamonna/chanzla construida sün ün bös-ch. L'uffizi ha surdat al cumün da sclerir quella fatschenda.

Dal tangà vaiva la direcziun pretais üna posiziun. Quel manzuna, d'avair piazzà la chasina sül bös-ch per scopos da giovar pels uffants. Seguond ordinaziun davart la planisaziun dal territori sun fabricats pitschens chi nu surpassan il volüm da max. 5 m³ admiss sainza dumondar permiss. Quista chasina masüra 4,5 m³.

La suprastanza discuta il punct cardinal, dimena scha quella masüra s'inclegia be per chasinas sül fuond obain per da quellas sün bös-cha. Il manader tecnic ha fat ils sclerimaints cul uffizi e consultà las prescripziuns da la ledscha (OPTGR / KRVO – ordinaziun davart la planisaziun dal territori pel chantun Grischun). La retscherchas demuossan, chi nun es ninglur definà resp. fixà il punct chi pertocca scha la chasina as rechatta sül fuond obain sün ün bös-ch. Uschè decida la suprastanza da desister d'ün chasti e da la pretaisa da sbodada.

Al tangà vain infuormà in quist sen e til rendü attent, cha la construcziun sco chasina per uffants saja zuond privlusa e chi pudessan succeder accidaints.

790 Planisaziun dal territori

- 128 **Ingrondimaint zona da deponia Prà Dadora**

La planisaziun da l'ingrondimaint da la deponia es gnüda fatta dal büro Canclini & Peer Scrl. In basa a quella ha nos planisader planisà l'ingrondimaint da la zona da deponia. Il manader tecnic preschainta la documainta e dà las infuormaziuns necessarias.

L'ingrondimaint previs da la deponia tip A (material da s-chav net) importa ca. 850'000 m³. Quel da la deponia tip B (material d'inert) importa raduond 65'000 m³. Quist ingrondimaint chaschuna pel cumün entradas supplementaras considerablas.

L'ingrondimaint previs rajiundscha per part l'otezza da la via Engiadina e per part surpassa quel dafatta a quella. Davart da l'uffizi per la natüra ed ambient sco eir davart l'uffizi da construcziun bassa vain i d'accord cun quel ingrondimaint. La suprastanza consulta tuot la documainta e va daperüna cul proget. Il proceder per quel as preschainta sco segua:

- Examinaziun preliminar davart dal Chantun
- Exposiziun da cooperaziun
- Approvaziun davart da la radunanza cumünala
- Exposiziun da recuors
- Approvaziun davart da la regenza
- Publicaziun da la decisiun da la regenza
- Dumonda da fabrica al Chantun (proceder BAB)

801 Vias champestras

129 **Surpassamaint vias champestras**

Al tangà es gnü concess l'udida giuridica e quel ha tut posiziun in scrit. El motiva il surpassamaint sco segua:

El e sa duonna han retrat il permiss annual sün ün veicul. Quel di d'eira quel veicul in öter lö e latras es lura sia duonna transida cun lur seguond veicul sülla via champestra. La vignetta d'eira gnüda müdada sül veicul manzunà ed uschè sun els its oura dal fat, cha cun quai saja per quel di il permiss pel seguond veicul reglà. In basa a quell'argumantaziun dumondan els da desister d'ün chasti.

La suprastanza tratta la fatschenda e riva a la conclusiun chi nu po gnir desisti d'ün chasti. Pel veicul chi'd es gnü observà nun exista ingün permiss, uschè cha quel surpassamaint sto gnir puni e quai cun frs. 200.00.

300 Promoziun da cultura

130 **Contribuziun al Padrinadi Svizzer per cumüns in muntogna**

Fuond special pel cumün da Bondo

Las strasoras e boudas a Bondo han chaschunà dons desastrus. Ca. 4 milliuns m3 crappa e belma sun crodats dal Piz Cengalo giò illa val ed han laschè inavo ün desert da grava da plüs kilometers chi ha desdrüt chasas, vias ed infrastruttura.

A chaschun da quel fat ha il padrinadi svizzer per cumüns da muntogna fuormà ün fuond special per Bondo ed ha miss a disposiziun la somma da frs. 500'000.00 per masüras immediatas. Il padrinadi conceda quista jada eir als cumüns da muntogna l'ocasiun da's muossar solidaric cul cumün da Bondo. In vista a quist cas extraordinari decida la suprastanza da contribuir la somma da frs. 10'000.00 a favur da quel fuond.

012 Executiva

131 **Orientaziuns**

Fundaziun Vnà

Quella invida a l'inauguraziun da la senda Vnà – Griosch, la quala il cumün insembel cun diversas gruppas e voluntaris tilla han construida.

L'inscunter ha lö in sonda, als 14 october 2017 a las 13:00h, reuniun a Vnà pro la scoulina. La suprastanza s'annunzcha fingià hoz in globo pro collega resunsabel, Fadri Riatsch.

Martina Schlapbach ed Andreas Brechbühl / chasa da la Bieraria Tschlin / proget Löin – Center da dürabilità

I'l fratemp vaiva l'administraziun invià inavant subit la documainta e la dumonda per üna contribuziun a l'uffizi federal ed infuormà eir a l'uffizi chantunal sur dal concept previs. Ils duos manzunats han intant stipulà ün contrat da reservaziun culla bieraria pella cumprita da la chasa Pedvi a Tschlin. Fintant es gnü prestada üna somma da frs. 20'000.00.

La suprastanza piglia cun satisfacziun cogniziun da quel fat. Ella tratterà lura davo cha l'object es gnü surtut dals petents supra ün sustegn eir davart dal cumün.

Cun üna posiziun resp. decisiun davart da l'uffizi federal as poja quintar ca. sülla mità da november 2017.

Matinadas 2018 a Tschlin

Ursina Caviezel infuormescha supra il program previs in fatschenda. Las mammas s'han abinadas cun Corsin Biert dal center da sandà regard l'adöver da la sala polivalenta. Previs sun seguaintas datas d'adöver:

01.01. lü.	Serrà
02.01. ma.	Matinadas uffants / mattas giuventüna
03.01. ma.	Avantmezdi rumir la sala / a mezdi sta quella a disposiziun dal center da bainesser
06.01. son.	Mattinadas giuventüna
07.01. dum.	Pulir e rumida da la sala / a mezdi sta quella a disposiziun dal center da bainesser

Lavuratori d'avegnir a Valsot / viver in Engiadina Bassa - eir ill'età avanzada

Ursina Caviezel, suprastanta dal dicasteri, vaiva fat part al lavuratori ed infuormescha lasupra. Id es gnü lavurà in möd intensiv in gruppas. Il punct il plü dominant es, chi vain giavüschà ün bus-taxi. Sch'ün cumün vess interess ed intenziun da realisar quella sporta as po quel contactar cun Gian Janett da l'Auto da Posta, il qual procura offertas. Ursina manzuna ulteriurs puncts chi sun gnüts selecziunats dals preschaints:

- Ramosch / plazzar üna mulda per s-chart da üert
- Cultivar plü bain ils bancs d'inviern
- Ramosch / i manca ün restorant per s'inscuntrar
- Ramosch / introducziun dal tempo 30 in cumün
- Chafllur / containers d'immundizchas
- Installar tualettas publicas
- Ramosch / realisar sendas da spassegiar

I seguan amo duos lavuratori. Fin la fin dal 2018 stu vess lura mincha cumün infuormar chenüns puncts ch'el ha realisà.

Cussagl administrativ / Bogn Engiadina SA

Armon Kirchen infuormescha sur da l'ultima sezzüda dal cussagl administrativ. Pervi da lavuors da sanaziun resta il bogn serrà dals 9 avrigl fin als 25 da mai. Sur Tschinquaisma vain quel però drivi cun üna sporta redotta.

Fabricat Evelyne Blanc, Tschlin

Armon Kirchen manzuna, ch'üna ditta haja plazzà material e maschinas da fabrica sülla via e laschà là quel deposit sur la fin d'eivna. Ün simil agir dà da pensar. Il problem es però pro'l Chantun, causa chi's tratta qua da la via chantunala.

Object cumünal a S-chadatsch

Armon Mayer manzuna chi sto gnir fat inavant culla vendita previssa al ACEB. I vain uossa contactà als respunsabels per sclerir la fatschenda in metond in vista ün termin pella decisiun.

012 Executiva

132 **Varia (suprastanza cumünala)**

Da la tractanda varia nu vegn fat adöver.

7556 Ramosch, 15.09.2017



Il capo:

Il manader administraziun: